

Qanoq iliorutta inuiaqatigiittut Naalagaaffiit Peqatigiit meeqqat pillugit isumaqatigiissutaanni nr. 2-mi allassimasoq “Immikkoortitsisoqassanngilaq” nunatsinni atuutissinnaavarput? Qanorlu meeqqat eqqugaasimasut inuiaqatigiinni akuutinneqartutut misigitissinnaavagut?

(Inatsisartuni ilaasorta, Aqqalu C. Jerimiassen, Atassut)

Akissuteqaat

(Meeqqanut, Inuusuttunut Ilaqutariinnullu Naalakkersuisoq)

Inoqatitsinnut isiginnittariaaserput qanoq ittuussanersoq pillugu oqallinnissamut pingaaruteqartumut siunnersuummut siunnersuuteqartumut, Aqqalu C. Jerimiassenimut qujanaq. Peersitsinerup, assigiinngitsitsinerup qinngasaarisarnerullu inuup imminut naleqassusaa sequmittarpaa. Meeqqap qinngasaartittarneq pillugu MIO-p angalanermit nalunaarusiaani ataatsimi ima oqaluttuaraa: “Qinngasaarneqartartoq imminut nikagilersarpoq atuariartorusukkunnaartarlunilu”. Qinngasaarisarnerup meeqqap siunissami periarfissai sequmittarpai. Kikkut tamarmik inuiaqatigiinni ilaasutut suleqataallutillu akuerineqarnissaminut pisinnaatitaaffeqartut Naalakkersuisut isumaqarput. Kikkut tamarmik soqutigisami malersornissaannut kiffaangissuseqassapput. Kikkut tamarmik naleqarput, tamannalu meeqqat tamarmik malugisinnaassavaat.

Naalakkersuisut inuiaqatigiinnik nukittuunik takorluugaqarput, tassani immitsinnut nukittorsarluta, ataqpeqatigiilluta paaseqatigiissaagut. Meeqqat ajattorneqartarnerat, nikagineqartarnerat imaluunniit ilaaqusaanngittarnerat akuerinngisaannassavarput. Tassani meeqqat ulloq unnuarlu paaqqinnittarfimmi najugaqartut, ilaqutariinni paarsisartuniittut angajoqqaaminiittulluunniit pineqarput. Meeqqat suaassusii, ammip qalipaataa, innarluuteqarneq allalluunniit apeqqutaatinnagit pineqarput. Naatsumik oqaatigalugu: Meeqqat tamarmik! Politikeritut, innuttaasutut angajoqqaatullu - meeqqagut qanoq ikkaluarpata naleqartuusut ilinniartinnissaannut, - peqataasitsisumik pitsaasumillu inoqatinut isiginninnermik ilinniartinnissaannut maligassiuisuunissatsinnik tamatta pissussaafeqarpugut.

Ikioqatigiinnissatsinnut nukittorsaqatigiinnissamik tamatta siusissukkut ilinniartittalissavagut. MIO-p angalanerminut nalunaarusiaani ataatsimi meeraq oqaluttuortoq tusaajuk: “Mikisuullungali assut qinngasaartittarsimavunga, sulilu oqaluuserineqartarlunga. Taava assut nikallungalertarpunga timinnilu soorlu nukissaarutivittutut misigisarlugu, sorusussuseeruttarlungalugu”. - Taamatut meeqqat imminnut naleerutsinneqartarnerat akuerisassaannngilluinnarpoq. Meeqqat avatangiisiminnit “qinngasaarisarnermut kulturi” ilikkartaraat MIO-p angalanermit nalunaarusiaasa takutippaat. Tamassuminnga allanngueqataanissatsinnut tamatta pisussaafeqarpugut.

Meeqqat ulloq unnuarlu paaqqinnittarfinniittut immikkut atugarliortutut inissisimasuupput, najukkaminni amerlanertigut nikagineqartarput. Najukkami inuiaqatigiit meeqqanut atugassarititaasut ilisimannikkaangamikkut, meeqqanut ulloq unnuarlu paaqqinnittarfimmiittunut isummat pigiliutiinnakkat pilersinneqartarput. Taamaammatt meeqqat, pisinnaatitaaffimmissut, ulloq unnuarlu paaqqinnittarfinni inissinneqarsimasut najukkaminni tamakkiisumik akuerineqartariaqarput. Ulloq unnuarlu paaqqinnittarfiit najukkaniittarput najukkanilu inuunermi ilaasarlutik.

Allat assigalugit akuutinneqarnissamut meeqqanut ikiuutaasunik ulloq unnuarlu paaqqinnittarfiit perorsaanermt periaatsinik suliniutinillu atuinissaat Naalakkersuisut ukkatarat. Angerlarsimaffippalaartumik ammasumillu killissaqartitsisumik, atugarissaarnissaq, paasineqarnissaq akuutinneqarnissarlu siunertaralugit, najukkami najugaqartuutimik nalinginnaasutut isigineqalernissaannut ulloq unnuarlu paaqqinnittarfiit annertuumik pingaarutilimmillu inissisimapput. Tamanna assersuutigalugu meeqqat ulloq unnuarlu paaqqinnittarfinni najugallit najukkani peqatigiiffinni akuusarneritigut ukioqatitik allat peqatigalugit timersorerisigut, najukkani piniartut piniqatiginerisigut imaluunniit najukkani sunngiffeqarnermi suliffeqartinnerisigut pisinnaavoq. Sunngiffimmi iliuitsit peqqinnartut meeqqat aarlerinartorsiortut isumaqarluartumik ataatsimoonernut ilaatilersarpaat namminerlu naleqassutsiminnik misiginerat annertusittarlugu. Tamannarpiq pissutigalugu timersorneq aqqutigalugu meeqqat pisinnaatitaaffiisa patajaallisarneqarnissaat pillugu suleqatigiinnissamik Timersoqatigiit Kattuffiat Kalaallit Nunaanni UNICEF-ilu isumaqatigiissusiorsimapput.

Naalakkersuisut angerlarsimaffiup avataanut inissinneqartartut amerlassusaat ikilisinniarlugit sulissuteqarput. Sulineq tamanna siusissukkut iliuseqarnermik aallartissaaq. Angajoqqaanngortussat angajoqqaanngornissaannut piareersarniarlugit kiisalu meeqqat atugarliortut siusissukkut nassaarineqarnissaannut pitsanngorsaaniarlutik Naalakkersuisut suliniutinik arlalinnik aallartitsisimapput. Siusinnerusukkut iliuseqarsinnaagutta ilaqutariinnut tamanut sammivilimmik suliniuteqarnissatsinnut pitsaanagerusumik periarfissaqalissaagut. *Killiliisa*, Naalakkersuisut kinguaassiutitigut atonerluineq akiorniarlugu periusissiaat, Innuttaasut peqqinnerulernissaannut pilersaarut *Inuuneritta III* aamma *Kalaallit Nunaanni meeqqanut inuusuttunullu atugarliortunut pitsaanagerusumik suliniuteqarnissaq pillugu kalaallit qallunaallu oqartussaasoqarfiisa assigiinngitsunik suliallit akornanni suleqatigiinneq*-mi suliniutit suliami uani tassaapput sakkussat pingaarutilit.

Sammisaq pingaaruteqartoq pillugu oqallilluarnissaq Naalakkersuisut qilanaaraat.